



I tons dal canon di Cjaurêt si fasevin simpri plui in ca, e la int come le paise e scjampave jù pe plane furlane.

Un dì tal curtîl dai Pontons, popolât di cuatri fameis, si presente un jeur dut spaurît di chês canonadis, no us dîs il diauleri, ducj a vierzi puartis di cjase, stale, arie, gjalinâr, cun chê di cjantonâlu te sperance di une bondante padielade, cenonè il jeur al sparîs tornant a meti la pâs intal curtîl.

Miute e jere tal ort a perecjâ cuatri fueis di lidric pe cene, tal tornâ in cjase e tire fûr di sot il seglâr le raine par curâlu, e ce cjate dentri, un bocon di jeur cal vares sfamât je l'om e i dodis fiis par une setemane, Diu al è grant, e disè, al viôt e al proviôt ancje in timp di vuere. Pôcs dîs dopo, i mucs amaçavin la uniche vacje de stale, ma Diu al è restât grant istès, e i grans de corone no an smetût di cori jenfri i dêts la sere, te ore dal rosari.

di Luciano Marinig